

Biografía di Leon Ricardo Ras

Leon Ricardo Ras a nace na Aruba dia 2 di juli 1945. Su number di cariño semper tabata Leon. Number di su tata ta Eusebio Ras y su mama ta Catharina Theresa Lampe. Leon a nace na Pos Chikito y a lanta na Cura Cabay. E ta number ocho di e total di nuebe ruman. Leon ta casa cu Sra. Helen Herda Rustveld y nan tin dos yiu homber. E mayor ta Harold Ronald y e otro ta Javier Ricardo. Harold ta toca trompet den St. Maarten Brassband y Ricky ta canta y a yega di gana Voz y Landia y Voz Hubenil. Evaristo, kende ta ruman di Leon, ta toca mandolin. Bernadino d.f.m. tambe tabata toca guitarra. Tommy ta toca sonfonia di boca y Denchi ta toca guitarra. Famia di Leon, Fan Ras tambe ta maestro den musica.



Segun Leon, e bida artistico no a trece cambio den bida, rumbo si!

Ora cu bo ta stima musica, ta pasobra bo ta stima bo instrumento musical y bo ta stima locual bo ta haci.

Cambio e no ta. Rumbo si! Pa motibo cu ora bo ta un musico, hasta bo mayornan, ta un bes pa siman bo ta mira nan. Hasta bo ta lubida con rond di bo cas ta! Leon a pasa 42 aña largo ta toca. Awor Leon ta bay sinta parib'i cas, den fresco sinta riba un banki e ta dal un copi cofi atardi. Segun Leon, no tin nada mas dushi cu bo cas! Anto ken tin e pasenshi cu tur e cosnan ey, cu mester a wanta cu ne 42 aña largo? Esey ta su señora! E ta hopi agradecido na dje.

E bida artistico

E bida artistico a cuminsa tempo e tabatin 6 aña. Leon a cuminsa toca sonfonia di boca cu 6 aña cu su ruman homber Tommy Bartolo a regal'e. E prome piesa cu Leon a toca ta El Merengue del Palisa. El a sigui y a lanta un conhunto, pero a bira malo y a stop. Leon no por a pasa e paranda cu su sonfonia di boca. Despues cu el a biba na Cura Cabay, el a stop di toca sonfonia di boca. Leon ta stima guitarra, e tabatin pasion pa e guitarra. Un señora cu yama Nina Lampe (dfm) a regal'e un guitarra Mexicano chikito cu tabata kibra. Si Leon logra drech'e, e por bay cu ne. Asina el a siña toca. For di ken el a siña? Niun hende no a siñ'e! El a wak con e tocadonan ta pone nan dedenan y asina el a cuminsa toca. Anto despues Leon a bay puntra Lucas van der Linden, pa must'r'e algun cos di musica. Leon a cuminsa raya e guitarra. Cu su 13 aña di edad, el a duna un show cu Trio Brazil hunto cu ruman di Bernadina Growell y Trio Las Campiranas den Trappers Club. Trio Brazil tabata consisti di Leon, Dencho y Hermanes

Leon despues ta toca cuatro den paranda di Dande, Fiesta di Dera Gay etc. Esaki tabata na e edad di 16 aña. Despues Leon a sigui bay den e programa “Buscando talento artistico.” E ta corda cu el a gana un “bon di regalo” pa cantamento, pa asina e bay busca un icecream na Piet’s Soda Fountain. Melinda Leonor tabata compaña tur hende riba piano. Na edad halto, Leon a cuminsa toca fio ora cu el a hay’e regalo di su suegro. E ta un Antonio Salbani di aña 1721. Dia cu su suegro a bira pensionado, el a trece pa Leon. Despues cu el a bira mas grandi, el a coy e guitarra y a cuminsa saca melodia riba dje, raya y compaña.



Dedicacion y estilo musical

Segun Leon, si bo tin smaak, si bo tin amor pa locual bo ta haci, tempo no ta existi ora bo ta dedica y ta desea di siña domina un instrumento musical. Si bo no tin amor pa e instrumento, no hacie! E tecnica pa practica ta cu bo tin cu busc’e cu bo oido. Bo tin cu busc’e! Tur locual cu un hende traha riba noot, bo ta hay’e! Hacie cu amor y disciplina, bo ta haci tur cos bon. E fio tin su tecnica di baha y subi y keda cu e mesun tono. Cu sonfonia di boca, bo tin cu siña traha cu bo rosea ora di supla y hala rosea, practica te ora bo haya un bunita tono y ta zona balansa y pefecto. Bo tin por ehempel estilo di musica Mexicano, estilo di son di Jalisco y e arte ta pa domina e diferente estilonan aki. Bo tin di tene cuenta cu hopi cos! Despues Leon a pasa pa musica folklore, dansa, polka, mazurka y wals.

Desaroyo musical

Leon a toca 21 aña pa Mariachi Perla di Aruba. El a toca 11 aña cu Mariachi Orguyo. Leon a lanta Trio Los Canarios, Trio Brazil y Mariachi Copa De Plata tambe. Di tur grupo, e tin potret y disco compacto. Leon tabata tesoro di Mariachi Perla pa 9 aña. E tabata manager di Mariachi Orguyo pa 11 aña.

E parti Internacional

Leon a toca hunto cu Mariachi Ramos, Mariachi Fortuna y Mariachi Vargas na Tecalitlán riba Plaza Benito Juarez na Jalisco. Esaki tabata cu Mariachi Perla di Aruba e tempo ey. Na Venezuela, Tipico Los Canarios a toca cu Jeff Lint como cantante hunto cu Trio No Mora, Daniel Santo, Enrique Sandoval. Leon a compaña algun cantante grandi, manera Tito Ortiel y Yolanda del Rio na Aruba Concord Hotel. Leon a presenta na Hulanda, Cancun, Bahamas, Cayman Island, Cozumel, Mexico, Corsou y Boneiro. Tambe el a biaha riba e barco di turista Free Winds, pa dos siman. Nan a keda pasa den tur e region. Esey tabata cu Mariachi Orguyo.



Grabacion realisa

Leon a graba 2 LP den Mariachi Perla di Aruba, 4 cuarenticinco y un disco compacto. El a graba 2 LP cu Los Canarios y 1 LP cu Mariachi Orguyo. Leon su prome disco graba tabata un wals, su nomber ta Wals Canario. Pero el a bay top y el a keda top te awe! E ta graba pa Jenny Maduro, banda di lama na su cas. Despues nan a manda e grabacion Colombia pa traha disco.

Acontecimiento cu Leon ta considera mas importante den e bida artistico

Ora cu bo ta stima musica, ta pasobra bo ta stima bo instrumento musical y bo ta stima locual bo ta haci. No hacie pa beneficio personal. Hacie cu amor pa bo sali bay dedica, pa toca cu amor! Wak e Mexicanonan, wak kico nan ta bisa bo! Cuida bo instrumento, no yega un caminda, bent'e den pochi mata pa bo bay para na bar. Hamas y nunca m'a pone mi fio banda di un pochi mata! Den mi man, ey mi ta keda cu ne!



Sugerencia pa e futuro generacion

Wel, bo mester start for di chikito caba. Ya bo tin e amor pa musica caba, e amor den bo curpa t'ey caba, bo ta gar'e! Pasobra segun Leon, e no ta un gran musico den su bida. El a siña hopi cantante, el a siña Gos Oduber y Fan Ras toca. Y e no ta ni skirbi ni lesa musica



Leon Ras cu Mariachi Perla di Aruba



Mariachi Perla di Aruba riba e flota pa bay Isla de Oro